



KENYATAAN AKHBAR OLEH KETUA AUDIT NEGARA

BERKENAAN:

LAPORAN KETUA AUDIT NEGARA MENGENAI PENYATA KEWANGAN KERAJAAN NEGERI DAN AGENSI NEGERI SERTA PENGAUDITAN PEMATUHAN JABATAN NEGERI PERLIS TAHUN 2019

1. Pengauditan Penyata Kewangan Kerajaan Negeri Perlis dilaksanakan selaras dengan Seksyen 5(1)(a) Akta Audit 1957 yang menghendaki Ketua Audit Negara mengaudit akaun Persekutuan dan Negeri. Perkara 107(1) Perlembagaan Persekutuan menghendaki Ketua Audit Negara mengemukakan laporannya kepada Yang di-Pertuan Agong yang hendaklah menyebabkan laporan itu dibentangkan di hadapan Dewan Rakyat. Perkara 107(2) pula menyebut manamana laporan yang berhubungan dengan sesuatu negeri hendaklah dikemukakan kepada Sultan/Raja atau Yang di-Pertua Negeri bagi negeri itu untuk dibentangkan di hadapan Dewan Undangan Negeri.
2. Laporan Ketua Audit Negara (LKAN) Mengenai Penyata Kewangan Kerajaan Negeri dan Agensi Negeri serta Pengauditan Pematuhan Jabatan Negeri Perlis Tahun 2019 telah dibentangkan di Dewan Rakyat pada 5 November 2020, setelah diperkenankan oleh Kebawah Duli Yang Maha Mulia Seri Paduka Baginda Yang di-Pertuan Agong. Seterusnya LKAN telah mendapat perkenan Kebawah Duli Yang Maha Mulia Tuanku Raja Perlis pada 20 November 2020 untuk dibentangkan di Dewan Undangan Negeri Perlis pada 8 Disember 2020.
3. LKAN pada kali ini antara lainnya mengandungi perkara-perkara penting seperti berikut:

3.1. Pengesahan Penyata Kewangan Kerajaan Negeri Perlis

Pengauditan yang dijalankan mendapati Penyata Kewangan Kerajaan Negeri Perlis Bagi Tahun Berakhir 31 Disember 2019 telah diberi Pendapat Tanpa Teguran. Penyata kewangan tersebut telah menunjukkan gambaran yang benar dan saksama tentang kedudukan kewangan

kerajaan negeri dan rekod perakaunan telah diselenggarakan dengan teratur dan kemas kini.

3.2. Analisis Kewangan Kerajaan Negeri

- a. Jabatan Audit Negara di samping mengesahkan penyata kewangan kerajaan negeri, juga membuat analisis terhadap kedudukan kewangan kerajaan negeri. Analisis Audit berdasarkan kepada Penyata Kedudukan Kewangan, Penyata Penerimaan dan Pembayaran Wang Tunai, Penyata Prestasi Kewangan, Penyata Akaun Memorandum dan Nota Kepada Penyata Kewangan
- b. Analisis Audit mendapati kedudukan kewangan Kerajaan negeri adalah stabil. Baki terkumpul Kumpulan Wang Disatukan pada akhir tahun 2019 adalah berjumlah RM45.38 juta, iaitu meningkat sebanyak RM23.18 juta berbanding RM22.20 juta pada akhir tahun 2018.
- c. Kutipan hasil meningkat sebanyak RM23.21 juta atau 18.1% menjadi RM151.29 juta berbanding RM128.08 juta pada tahun 2018.
- d. Prestasi perbelanjaan dan pelaksanaan projek pembangunan Kerajaan negeri di bawah RMKe-11 pada tahun 2019 adalah sangat baik, iaitu sejumlah RM53.34 juta (96.5%) telah dibelanjakan berbanding RM55.28 juta yang diperuntukkan. Daripada 692 jumlah projek yang dirancang, 686 projek atau 99.1% telah disiapkan sepenuhnya manakala enam (6) projek atau 0.9% sedang dilaksanakan. Tiada projek yang masih belum dimulakan atau ditangguh.
- e. Baki Pinjaman Boleh Dituntut menurun sebanyak RM0.79 juta atau 0.7% daripada RM109.72 juta pada tahun 2018 kepada RM108.93 juta pada tahun 2019. Tunggakan Bayaran Balik Pinjaman Boleh Dituntut menurun sebanyak RM0.91 juta atau 1% daripada RM88.76 juta pada tahun 2018 kepada RM87.85 juta pada tahun 2019.
- f. Jumlah Hutang Awam menurun sebanyak RM135.30 juta atau 33.5% menjadi RM268.02 juta berbanding RM403.32 juta pada tahun 2018. Tunggakan bayaran balik Hutang Awam oleh Kerajaan negeri menurun sebanyak RM62.81 juta atau 25.7% menjadi RM181.47 juta berbanding RM244.28 juta pada tahun 2018.

3.3. Penyerahan, Pengesahan, Pembentangan Penyata Kewangan dan Prestasi Kewangan Agensi Negeri

- a. Mengikut Seksyen 5(1)(c), Akta Audit 1957, Ketua Audit Negara mempunyai kuasa untuk mengaudit penyata kewangan agensi negeri iaitu Badan Berkanun Negeri (BBN), Pihak Berkuasa Tempatan (PBT) dan Majlis Agama Islam (MAI). Objektif pengauditan adalah untuk memberikan pendapat terhadap penyata kewangan agensi negeri sama ada penyata ini menggambarkan kedudukan yang benar dan saksama serta rekod perakaunan yang berkaitan telah diselenggarakan dengan teratur dan kemas kini.
- b. Setakat 31 Ogos 2020, bilangan penyata kewangan yang telah mengemukakan penyata kewangan bagi tahun berakhir 31 Disember 2019 untuk diaudit adalah seperti berikut:

BIL.	PENYATA KEWANGAN	BILANGAN PENYATA KEWANGAN TAHUN 2019	DIKEMUKAKAN SEBELUM 31.08.2020
1.	Badan Berkanun Negeri	6	6
2.	Pihak Berkuasa Tempatan	1	1
3.	Majlis Agama Islam	1	1
JUMLAH		8	8

- c. Daripada lapan (8) agensi negeri yang telah mengemukakan penyata kewangan, hanya dua (2) agensi mengemukakan penyata kewangan dalam tempoh yang ditetapkan iaitu sebelum atau pada 30 April 2020. Enam (6) agensi mengemukakan penyata kewangan selepas tempoh ditetapkan kerana kesan daripada pelaksanaan Perintah Kawalan Pergerakan untuk mengekang penularan pandemik COVID-19. Agensi telah memohon pelanjutan tempoh untuk mengemukakan penyata kewangan sehingga 30 Jun 2020 dan telah diluluskan oleh Pegawai Kewangan Negeri Perlis.
- d. Setakat 31 Ogos 2020, sebanyak tiga (3) daripada lapan (8) penyata kewangan agensi negeri bagi tahun 2019 telah diaudit dan dikeluarkan Pendapat Tanpa Teguran. Lima (5) penyata kewangan agensi negeri yang lain masih dalam proses pengauditan.

3.4. Pengauditan Pematuhan Jabatan Negeri

Laporan pada kali ini turut mengandungi perenggan yang berkaitan dengan pengauditan pematuhan. Pengauditan pematuhan terhadap jabatan/agensi negeri bertujuan untuk memastikan pematuhan kepada undang-undang dan peraturan kewangan yang berkuat kuasa serta rekod kewangan berkaitan diselenggara dengan teratur dan kemas kini. Pengauditan ini dilaksanakan berdasarkan ISSAI 4000 dan 4100. Pengauditan pematuhan menggunakan pendekatan 3P1K, iaitu mengenal pasti elemen pembaziran, pemborosan, penyelewengan dan ketirisan wang awam. Pengauditan pematuhan dilaksanakan terhadap dua (2) perkara melibatkan dua (2) jabatan seperti berikut:

- (a) Perbelanjaan Akaun Amanah Kelas Pengajian Al-Quran dan Fardhu Ain (KAFA) serta Akaun Amanah Elaun Pegawai Masjid di Jabatan Hal Ehwal Agama Islam Perlis (JAIPs); dan
 - (b) Perbelanjaan Penyenggaraan di Jabatan Kerja Raya Negeri Perlis (JKR).
4. LKAN Mengenai Penyata Kewangan Kerajaan Negeri dan Agensi Negeri serta Pengauditan Pematuhan Jabatan Negeri Perlis Tahun 2019 dijadual dibentangkan di hadapan Dewan Undangan Negeri Perlis pada 8 Disember 2020 jam 9.30 pagi. Oleh itu, LKAN ini akan dimuat naik di laman web Jabatan Audit Negara pada tarikh yang sama. Orang awam boleh melayarinya di alamat <http://www.audit.gov.my> selepas pembentangan di Dewan Undangan Negeri Perlis. Sebarang pertanyaan lanjut/pandangan mengenai Laporan tersebut bolehlah dialamatkan kepada jbaudit@audit.gov.my

Ketua Audit Negara
Malaysia

8 Disember 2020